



**PEKELILING KETUA PENGARAH GALIAN
JABATAN MINERAL DAN GEOSAINS MALAYSIA
BILANGAN 1/2020**

**PROSEDUR PERTIMBANGAN PERMOHONAN SURAT KELULUSAN
SKIM PENGENDALIAN MELOMBONG (SKSPM)
DI KAWASAN SENSITIF**

1. TUJUAN

Pekeliling ini bertujuan menjelaskan mengenai proses baharu permohonan Surat Kelulusan Skim Pengendalian Melombong (SKSPM) di JMG Malaysia sebagai langkah untuk memperbaiki tadbir urus (governance) di bawah Akta Pembangunan Mineral 1994 seperti yang dipersetujui oleh Pengurusan Tertinggi JMG. Pekeliling ini memperkenalkan beberapa langkah penambahbaikan seperti permohonan SKSPM bagi kawasan sensitif yang kini akan dibawa ke Ibu Pejabat untuk pertimbangan oleh Ketua Pengarah.

2. TAFSIRAN

“pegawai yang dilantik” ertinya mana-mana pegawai yang telah dilantik di bawah Akta Pembangunan Mineral 1994;

“kawasan sensitif” ertinya Pajakan Melombong atau Lesen Melombong Tuan Punya yang:

- a) jumlah keluasan (aggregate area) kurang dari 50 ekar (20 hektar);
- b) terletak di bahagian hulu sungai (upstream) muka sawk kepada Loji Rawatan Air (LRA);
- c) baharu diluluskan dan dikenakan EIA tetapi bukan untuk pengeluaran agregat pembinaan;
- d) diluluskan tanpa melalui proses permohonan carigali atau penjelajahan; dan
- e) diluluskan untuk mineral strategik

“Ketua Pengarah” ertinya Ketua Pengarah Galian yang dilantik di bawah seksyen 4 Akta Pembangunan Mineral 1994 dan termasuklah mana-mana Timbalan Ketua Pengarah Galian dan mempunyai semua kawalan,

arahan dan pengawasan ke atas Pegawai Yang Dilantik di bawah subseksyen 4 (2) Akta yang sama;

“mineral strategik” ertinya mineral tertentu yang dianggap penting kepada pertumbuhan ekonomi negara seperti nadir bumi bukan radioaktif;

“Surat Kelulusan Skim Pengendalian Melombong” ertinya kelulusan Pengarah ke atas suatu skim pengendalian melombong bagi kerja pembangunan dan perlombongan di atas tanah pajakan melombong atau lesen melombong tuan punya sebelum apa-apa kerja pembangunan atau perlombongan boleh dimulakan;

“Pengarah” ertinya seorang Pengarah Galian yang dilantik di bawah seksyen 4 dan termasuklah mana mana Timbalan Pengarah Galian;

“Jawatankuasa SKSPM Ibu Pejabat” ertinya suatu jawatankuasa yang dipengerusikan oleh Ketua Pengarah dan ahlinya terdiri daripada beberapa Agensi teknikal yang ditentukan oleh Ketua Pengarah;

3. LATAR BELAKANG

3.1 Pada 28 Mei 2020, Yang Berhormat Menteri Tenaga dan Sumber Asli telah mengeluarkan kenyataan bahawa “Kerajaan dalam memastikan industri mineral memberi sumbangan besar kepada ekonomi negara akan menggalakkan lebih banyak aktiviti eksplorasi sumber mineral dijalankan terutamanya kajian dan pembangunan ke atas mineral strategik seperti elemen nadir bumi (REE)”.

3.2 Di samping itu, Malaysia telah komited untuk melaksanakan Sustainable Development Goals (SDGs) yang telah dipersetujui oleh komuniti antarabangsa di mana pada tahun 2030 sumber asli termasuk mineral hendaklah diuruskan secara mampan dan digunakan secara efisien.

3.3 Untuk merealisasikan hasrat Kerajaan terhadap komitmen SDGs dan menjana kekayaan baharu, KeTSA melalui JMG akan melaksanakan dasar-dasar mengenai industri mineral seperti:

- i. Kawalan ke atas sumber mineral strategik/ kritikal
- ii. Pengusaha kompeten daripada segi teknikal dan kewangan
- iii. Perlombongan secara mampan yang mengamalkan amalan terbaik, kawalan sendiri dan tadbir urus korporat
- iv. Perlombongan skala besar berteknologi moden
- v. Produk-produk ditambah nilai

3.4 Selaras dengan saranan Yang Berhormat Menteri Tenaga dan Sumber Asli untuk melihat pembangunan industri perlombongan dibuat secara mampan dan mengambilkira aspek pemeliharaan alam sekitar,

oleh itu pegawai yang dilantik adalah diingatkan agar melaksanakan tugas dengan kuasa yang telah diperuntukkan secara tegas jika berlaku sebarang ketidakpatuhan.

3.5 JMG juga diminta memberikan penekanan terhadap aspek penguatkuasaan lombong serta mengambil tindakan perundangan seperti mengenakan kompaun atau pendakwaan ke atas mana-mana pemegang tenemen baik syarikat atau individu yang melanggar peruntukan undang-undang perlombongan sedia ada.

3.6 Menurut Pekeliling Ketua Pengarah Galian Malaysia Bil 1/2018, kelulusan SKSPM dibuat secara bersama di dalam jawatankuasa yang dipengerusikan oleh Pengarah Negeri. Bagi kawasan sensitif seperti hulu muka sauk (*upstream water intake*), ahli jawatankuasa kelulusan SKSPM adalah dianggotai oleh JAS, JPS, PTG, dan agensi-agensi lain yang berkenaan. Tetapi, bagi kawasan tidak sensitif ahli jawatankuasa kelulusan SKSPM hanya terdiri daripada Timbalan Pengarah Unit Pembangunan Lombong dan Kuari, Timbalan Pengarah Unit Sumber Mineral dan Timbalan Pengarah Unit Geosains.

3.7 Berdasarkan kepada pindaan Pekeliling Ketua Pengarah Bil 1/2018 tersebut, permohonan baharu SKSPM bagi kawasan sensitif akan dipertimbangkan oleh Jawatankuasa SKSPM Ibu Pejabat yang dipengerusikan Ketua Pengarah dan termasuk permohonan pembaharuan kecuali bagi kawasan sensitif (c) dan (d).

4. PROSEDUR PELAKSANAAN

4.1 Permohonan SKSPM bagi kawasan sensitif akan dibawa ke Ibu Pejabat untuk pertimbangan oleh Jawatankuasa yang dipengerusikan oleh Ketua Pengarah;

4.2 Konsultan dan pemohon/ wakil pemohon akan membuat pembentangan skim melombong yang dicadangkan dan perlu menghadiri sesi soal jawab;

4.3 Satu (1) salinan permohonan SKSPM, laporan ringkas JMG negeri mengenai permohonan dan dokumen Skim Pengendalian Melombong kawasan sensitif hendaklah dikemukakan kepada Ketua Pengarah dalam bentuk cetakan dan digital (*hardcopy* dan *softcopy*) dalam tempoh satu (1) minggu sebelum tarikh mesyuarat Jawatankuasa SKSPM Ibu Pejabat.

4.4 Mesyuarat Jawatankuasa SKSPM Ibu Pejabat akan diadakan sekurang-kurangnya 2 kali sebulan atau mengikut keperluan iaitu pada minggu pertama dan minggu ketiga setiap bulan;

4.5 Cawangan PPO dipertanggungjawabkan sebagai Urusetia bagi Jawatankuasa SKSPM Ibu Pejabat;

4.6 Walaubagaimanapun, sekiranya didapati permohonan tidak menepati kriteria kawasan sensitif, Ketua Pengarah boleh mengembalikan semula permohonan tersebut untuk diproses oleh JMG negeri berkenaan;

5. ARAHAN PEMAKAIAN

5.1 Pekeliling ini hendaklah sentiasa dipatuhi dan dilaksanakan oleh semua pegawai yang dilantik dan berkuatkuasa 1 Julai 2020.

5.2 Pekeliling ini meminda Pekeliling Ketua Pengarah Bil 1/2018 bagi bahagian mengenai pertimbangan SKSPM untuk kawasan sensitif seperti dalam tafsiran.

5.3 Pekeliling ini melengkapi dan tidak mengatasi peruntukan-peruntukan di dalam Akta Pembangunan Mineral 1994 dan peraturan-peraturan di bawahnya.


5.4 Setiap Pengarah Negeri adalah dipertanggungjawabkan untuk melaksanakan pekeling ini.

6. HAL-HAL LAIN

6.1 Pekeliling ini boleh digunapakai untuk permohonan Lesen Memproses Mineral:

- a) terpusat; dan
- b) sendiri (*standalone*) yang terletak sebagai Kawasan Sensitif Alam Sekitar.

6.2 Peranan dan penglibatan konsultan akan digunakan sepenuhnya yang mana mereka hendaklah membuat pembentangan, pemantauan, pengesahan dan perakuan selamat untuk beroperasi.


(DATUK SHAHAR EFFENDI BIN ABDULLAH AZIZI)

Ketua Pengarah Galian
Jabatan Mineral dan Geosains Malaysia.

bertarikh:

1/7/2020